



# ATUR SEMBIANG RUANG BILIK NGINTU HARI GAWAI (MAYA ATUR PEJALAI BESEKAT)

**PENERANG:** *Ketegal Atur Pejalai Besekat dikena nagang penyakit Covid-19 ari ngelekai, Hari Gawai Dayak taun 2020 tu enda ulih diintu ngena chara begelumu bebala mayuh. Taja pia, kitai orang Kristian patut terus ngintu Hari Gawai tu ngena chara sembiang dalam ruang bilik diri empu. Kebuah pia laban Hari Gawai Dayak nya besangkut paut enggau pengerami beterima kasih ngagai Allah Taala ke semua berekat ti udah diberi Iya ngagai kitai dalam kandang setaun tu ke udah. Atur sembiang tu tau diuluka tuai bilik, tauka barang sapa ti ulih ngulu dalam ruang bilik nya. Enti ulih asuh sida ti nemiak nguluka pengawa belagu enggau nguluka macha Masmur 100.*

## **LAGU TAUKA PANTUN TAU DINYANYI**

*Tauka diau jenuh enda lama*

Reader: + Dalam Nama Apai, Anak enggau Roh Kudus. Amin

Reader: Allah Taala ti pemadu bekuasa, Tuhan ti endang meruan, seharitu kami begelumu ditu dalam nama Nuan laban kami deka meri Nuan puji enggau terima kasih ke pemesai pemanah enggau pengerindu Nuan ti udah meri kami peluang ngintu Hari Gawai Dayak. Taja pen taun tu kami enda ulih ngintu Hari Gawai Dayak ngena chara begelumu bebala mayuh, tang kami ulih begelumu dalam ruang bilik kami. Dalam nama Anak Nuan, Tuhan Yesus Kristus kami besampi.

Semua: **Amin**

## **MASMUR 100**

*Bacha Masmur tu betimbal-timbal.*

Reader <sup>1</sup>Nyanyi gaga ati ke TUHAN meh semua kita dunya! <sup>2</sup>Sembah meh TUHAN enggau ati ti gaga, Datai ngagai Iya enggau lagu lantang ati!

Orang: <sup>3</sup>Anang enda ngaku TUHAN nya Allah Taala! Iya ngaga kitai, lalu kitai endang enggi Iya. Kitai tu nemiak Iya, kitai tu raban domba Iya.

Reader: <sup>4</sup>Tama nengah pintu Rumah Sembiang mai sampi terima kasih. Mansang ngagai endur ti kudus enggau pantun puji. Beri terima kasih ngagai Iya, lalu puji Iya.

Orang: <sup>5</sup> TUHAN endang badas. Pengerindu Iya meruan belama Iya, lalu penetap ati Iya meruan belama Iya.

Semua: **Mulia ke Apai enggau Anak enggau Roh Kudus, baka mulia Iya kelia, kemayatu lalu datai ke balama-lama Iya. Amin.**

Reader Allah Taala ti pepadu bekuasa, Apai kami ti di serega; kami seharitu begempuru ditu sampal indu-lelaki, tuai-biak mai ati ti gaga sereta rindu deka besampi ngagai Nuan ti pun penatai pengidup, pengasih enggau berekat ke kami mensia. Kami meri terima kasih ngagai Nuan Tuhan, laban seharitu kami ngintu Hari Gawai Dayak. Enggau ati ti gaga, kami meri puji enggau terima kasih ke semua berekat ti udah diberi Nuan ngagai kami, ti dikena kami ngemansangka pengawa enggau kereja kami. Terima kasih mega ke pengasih enggau pengerai ti diasaika kami, enggau pemanah bukai ti udah terengkah ba ruang bilik kami; lebih agi ke pemujur umai taun, anak-uchu kami ti besekula, pengawa kami enggau utai bukai ti enda ulih dirintaika kami ditu.

Kami besampi sereta minta ngagai Nuan Tuhan; awakka Nuan agi meda, nengkila; ngiching, merening; ngimbai, nerabai; nyelamat, merekat; ngadu, ngintu; ngemujur, ngatur; pendiau, pengidup, ati, runding, ulah, jaku enggau pengerai kami. Saup kami enggau kuasa Roh Kudus Nuan ngambika udah tu kami ngelengka semua ulah, runding enggau pengawa ti enda manah, lalu awakka Roh Kudus ngeringka kami ngereja semua pemanah enggau pengawa ti tuchi.

Ampun dosa kami ti selama tu, keringka pengelembut kami, adu manahka kaul kami enggau pangan diri, asuh kami tegap ati arap sereta nitihka Nuan, ngambika kami enda limpang ari ajar Nuan lalu selalu manggaika diri ba Nuan siku aja ti Tuhan.

Apai ti kasih, kami mega besampi sereta meri Nuan besai terima kasih laban Nuan udah nyaga kami ari penyakit Covid-19. Kami mega besampi ngambika kuasa Nuan terus ngelindung lalu ngeraika menua enggau tubuh kami ari penyakit tu enggau penyakit ti bukai. Kami besampi ngambika menua tu enggau Gerija Nuan ulih pulai manah baru baka ke ngelamatu; ngambika Gerija Nuan terus bekerembai lalu pulai ka pemanah enggau mulia Nuan. Kami besampi lalu minta semua utai tu dalam nama Anak Nuan, Jesus Kristus ti Tuhan enggau Pengelepas kami.

**Semua: Amin.**

Reader: Tuhan Allah ti pepadu bekuasa kami meri puji enggau terima kasih ke semua pemanah Nuan ti udah ngiring ngembing, ngemata nyaga, nyelamat sereta merekatka pengidup kami sepemanjai pengidup kami dalam taun ke udah lepas. Lalu maya tu kami beselamatkanka berekat nya. Ke taun ti deka datai, kami minta Nuan nambahka semua berekat ke udah diasaika kami; awakka Nuan nambahka penemu, penau, pengelandik enggau semua pemansang ti beguna ke tubuh enggau semangat kami; awakka kami lantang senang, gayu guru, gerai nyamai nuan menua. Kami mega besampi minta nuan merekat sereta nguduska semua pemakai ti udah disedia sereta deka dikunsika kami. Dalam dalam nama +Allah Apai, Allah Anak enggau Roh Kudus.

**Semua : Amin.**

Reader: Aram kitai sama nyebut sampi ti diajar Tuhan Jesus.

**Semua: Apai kami di serega; Kudus mih nama Nuan, datai mih perintah Nuan, jadi mih peneka Nuan, baka dalam serega baka nya di dunya. Beri ke kami pengidup tiap hari, ampun penyalah kami baka kami ngampun orang ti salah ngelaban kami. Intu kami ari penguji.**

Lepaska kami ari penyai. Kra, Nuan ti bempu perintah enggau kuasa, enggau mulia, datai ke belama-lama iya. Amin.

Semua: +Pengasih Jesus Kristus, pengerindu Allah Taala enggau penyaup Roh Kudus, meruan enggau semua kitai belama-lama iya. Amin.